





徐幹中論序

續編

卷之四

徐氏

予以荀卿子孟軻懷亞聖之才著一家之法繼明聖人之業皆以姓名自書猶至於今厥字不傳原思其故皆由戰國之世樂賢者寡同時之人不早記錄豈况徐子中論之書不以姓名為目乎恐歷久遠名或不傳故不量其才喟然感嘆先曰其德以發其姓名述其雅好不刊之行屬之篇首

以爲之序其辭曰世有雅達君子者姓徐
名幹字偉長北海劇人也其先業以清亮
臧否爲家世濟其美不墮其德至君之身
十世矣君含元休清明之氣持造化英括
之性放口而言則樂誦九德之文通耳而
識則教不再告未志乎學蓋已誦文數十
萬言矣年十四始讀五經發憤忘食下帷
專思以夜繼日父恐其得疾常禁止之故

能未至弱冠學五經悉載於口博覽傳記
言則成章操翰成文矣此時靈帝之末年
也國典隳廢冠族子弟結黨權門交援求
右競相尚爵號君病疾一作俗迷昏遂閉戶
自守不與之群以六籍娛心而已君子之
達也學無常師有一業勝已者便從學焉
必盡其所知而後釋之有一言之美不令
過耳必心識之志在總衆言之長統道德

之微恥一物之不知愧一藝之不克故日
夜亶亶晷不暇食夕不解衣晝則研精經
緯夜則歷觀列宿考混元於未形補聖德
之空缺誕長慮於無窮旌微言之將墜何
暇謹小學治浮名與俗士相彌縫哉故浮
淺寡識之人適解驅使榮利豈知大道之
根然其餘以䟽略為太簡曾無憂樂徒以
為習書之儒不足為上欣之者衆辯之者

寡故令君州問之稱不早彰徹然秉正獨
立志有所存俗之毀譽有如浮雲若有覺
而還反者則以道進之忘其前之謗已也
其犯而不校下學而上達皆此之類也于
時董卓作亂幼主西遷奸雄滿野天下無
主聖人之道息邪偽之事興營利之士得
譽守貞之賢不彰故令君譽聞不振於華
夏玉帛安車不至於門考其德行文藝實

帝王之佐也道之不行豈不惜哉君避地
海表自歸舊都州郡牧守禮命踈踏連武
欲致之君以爲縱橫之世乃先聖之所厄
困也豈况吾徒哉有譏孟軻不度其量擬
聖行道傳食諸侯深美顏淵荀卿之行故
絕迹山谷幽居研幾用思深妙以發疾疢
潛伏延年會上公撥亂王路始闢遂力疾
應命從戎征行歷載五六疾稍沉篤不堪

王事潛身窮巷願志保真淡泊無爲惟存
正道環堵之墻以庇妻子并日而食不以
爲戚養浩然之氣習美門之術時人或有
聞其如此而往觀之或有頗識其真而從
之者君無不容而見之厲以聲色度其情
志倡其言論知可以道長者則微而誘之
令益者不自覺而大化陰行其所匡濟亦
已多矣君之交也則不以其短各取其長

而善之取故少顯盡已之交亦無孜孜和
愛之好統聖人中和之業蹈賢哲守度之
行淵默難測誠寶偉之器也君之性常欲
損世之有餘益俗之不足見辭人美麗之
文並時而作曾無闡弘大義敷散道教上
求聖人之中下救流俗之昏者故廢詩賦
頌銘贊之文著中論之書二十篇其所甄
紀邁君昔志蓋百之一也文義未究年

四十八建安二十三年春二月遭厲疾大
命殞頽豈不痛哉余數侍坐觀君之言常
怖篤意自勉而心自薄也何則自顧才志
不如之遠矣耳然宗之仰之以爲師表自
君之亡有子貢山梁之行故追述其事靡
舉其顯露易知之數沈冥幽微深奧廣遠
者遺之精通君子將自贊明之也

臣始見館閣及世所有徐幹中論二十篇
以謂盡於此及觀貞觀政要怪太宗稱嘗
見幹中論復三年喪篇而今書此篇闕因
考之魏志見文帝稱幹著中論二十餘篇
於是知館閣及世所有幹中論二十篇者
非全書也幹字偉長北海人生於漢魏之
間魏文帝稱幹懷文抱質恬澹寡慾有箕
山之志而先賢行狀亦稱幹篤行體道不

耽世榮魏太祖特旌命之辭疾不就後以
為上艾長又以疾不行蓋漢承周衰及秦
滅學之餘百氏雜家與聖人之道並傳學
者罕能獨觀於道德之要而不牽於俗儒
之說至於治心養性去就語默之際能不
悖於理者固希矣况至於魏之濁世哉幹
獨能考六藝推仲尼孟軻之旨述而論之
求其辭時若有小失者要其歸不合於道

者少矣其所得於內者又能信而克之遂
巡濁世有去就顯晦之大節臣始讀其書
察其意而賢之因其書以求其為人又知
其行之可賢也惜其有補於世而識之者
少蓋迹其言行之所至而以世俗之好惡
觀之彼惡足以知其意哉顧臣之力豈足
以重其書使學者尊而信之因校其脫繆
而序其大略蓋所以致臣之意云編校書

籍臣曾鞏上

紹興二十八年戊寅清明日假朱丞本
校于博古堂石邦哲識

中論二卷漢司空軍謀祭酒掾屬五官
將文學北海徐幹偉長謨有序而無名
氏幹鄴下七子之一人也建安之間疾
辭人美麗之文不能敷散道教故著中
論辭義典雅當世嘉之按唐志六卷今
本二卷二十篇宋大理正山陰石邦哲

手校題識邦哲字熙明再世歲書至治
二年得之錢塘仇遠氏明年夏五月己
酉平原陸友友仁父記

徐幹中論目錄

卷上

治學

法象

脩本

虛道

貴驗

貴言

藝紀

覈辨

智行

爵祿

卷下

考偽

謹交

曆數

論天壽

務本

審大臣

慎所從

亡國

賞罰

民數

目錄終

徐幹中論卷之上



治學第一



昔之君子成德立行身沒而名不朽其故何哉學也學也者所以疏神達思怡情理性聖人之上務也民之初載其矇未知譬如寶在於玄室有所求而不見白日照焉則群物斯辯矣學者心之白日也故先王立教官掌教國子教以六德曰智仁聖義

中和教以六行。曰孝友睦婣任恤。教以六藝。曰禮樂射御書數。三教備而人道畢矣。學猶飾也。器不飾則無以爲美觀。人不學則無以有懿德。有懿德故可以經人倫。爲美觀故可以供神明。故書曰若作梓材。旣勤樸斲。惟其塗丹雘。夫聽黃鐘之聲。然後知擊缶之細。視衮龍之文。然後知被褐之陋。涉庠序之教。然後知不學之困。故學者如登山焉。勦而益高。如寤寐焉。久而愈足。顧所由來。則杳然其遠。以其難而懈之。誤且非矣。詩云高山仰止。景行行止。好學之謂也。倦立而思遠。不如速行之必至也。矯首而徇飛。不如循雌之必獲也。孤居而願智。不如務學之必達也。故君子心不苟願。必以求學。身不苟動。必以從師。言不苟出。必以博聞。是以情性合人。而德音相繼也。

孔子曰。弗學何以行。弗思何以得。小子勉之。斯可謂師人矣。馬雖有逸足而不閑。與則不為良駿。人雖有美質而不習道。則不為君子。故學者求習道也。若有似乎畫采。玄黃之色。既著。而純皓之體。斯已。敝而不渝。孰知其素。歟。子夏曰。日習則學不怠。自勉則身不墮。亟聞天下之大言。則志益廣。故君子之於學也。其不懈。猶上天之動。猶

日月之行。終身亶亶。沒而後已。故雖有其才。而無其志。亦不能興其功也。志者學之師也。才者學之徒也。學者不患才之不贍。而患志之不立。是以為之者億兆。而成之者無幾。故君子必立其志。易曰。君子以自強不息。大樂之成。非取乎一音。嘉膳之和。非取乎一味。聖人之德。非取乎一道。故曰。學者所以總群道也。群道統乎已。心群言

一乎已。唯所用之。故出則元亨。處則利貞。默則立。象語則成文。述千載之上。若共一時。論殊俗之類。若與同室。度幽明之故。若見其情。原治亂之漸。若指已効。故詩曰。學有緝熙于光明。其此之謂也。夫獨思則滯而不通。獨為則困而不就。人心必有明焉。必有悟焉。如火得風而炎熾。如水赴下而流速。故太昊觀天地而畫八卦。燧人察

時令而鑿火。帝軒聞鳳鳴而調律。倉頡視鳥跡而作書。斯大聖之學乎。神明而發乎物類也。賢者不能學於遠。乃學於近。故以聖人為師。昔顏淵之學聖人也。聞一以知十。子貢聞一以知二。斯皆觸類而長之。篤思而聞之者也。非唯賢者學於聖人。聖人亦相因而學也。孔子因於文武。文武因於成湯。成湯因於夏后。夏后因於堯舜。故六

籍者群聖相因之書也。其人雖亡，其道猶存。今之學者，勤心以取之，亦足以到昭明而成博達矣。凡學者，大義為先，物名為後。大義舉而物名從之，然鄙儒之博學也，務於物名，詳於器械，矜於詁訓，摘其章句，而不能統其大義之所極，以獲先王之心。此無異乎女史誦詩，內豎傳令也。故使學者勞思慮而不知道，費日月而無成功。故君

子必擇師焉。

法象第二

夫法象立，所以為君子。法象者，莫先乎正容貌，慎威儀，是故先王之制禮也。為冕服，采章以旌之，為珮玉，鳴璜以聲之，欲其尊也。欲其莊也，焉可懈慢也。夫容貌者，人之符表也。符表正，故情性治；情性治，故仁義存。仁義存，故盛德著。盛德著，故可以為法。

象斯謂之君子矣君子者無尺土之封而
萬民尊之無刑罰之威而萬民畏之無羽
籥之樂而萬民樂之無爵祿之賞而萬民
懷之其所以致之者一也故孔子曰君子
威而不猛泰而不驕詩云敬爾威儀惟民
之則若夫墮其威儀恍其瞻視忽其辭令
而望民之則我者未之有也莫之則者則
慢之者至矣小人皆慢也而致怨乎人患

已之卑而不知其所以然哀哉故書曰惟
聖罔念作狂惟狂克念作聖人性之所簡
也存乎幽微人情之所忽也存乎孤獨夫
幽微者顯之原也孤獨者見之端也胡可
簡也胡可忽也是故君子敬孤獨而慎幽
微雖在隱蔽鬼神不得見其隙也詩云肅
肅兔置施於中林處獨之謂也又有顛沛
而不可亂者則成王季路其人也昔者成

王將崩體被冕服然後發顧命之辭季路
遭亂結纓而後死白刃之難夫以
困白刃之難猶不忘敬况於遊宴乎故詩
曰就其深矣方之舟之就其淺矣泳之游
之言必濟也君子口無戲謔之言言必有
防身無戲謔之行行必有檢故雖妻妾不
可得而黷也雖朋友不可得而狎也是以
不愠怒而德行行於閨門不諛諭而風聲

化乎鄉黨傳稱大人正己而物自正者蓋
此之謂也以匹夫之居猶然况得意而行
於天下者乎唐堯之帝允恭克讓而光被
四表成湯不敢怠遑而奄有九域文王祗
畏而造彼區夏易曰觀盥而不薦有孚顒
若言下觀而化也禍敗之由也則有媒慢
以為階可無慎乎昔宋敏碎首於棊局陳
靈被禍於戲言閻邴造逆於相詬子公生

弒於嘗黿是故居子居身也謙在敵也讓
臨下也莊奉上也敬四者備而怨咎不作
福祿從之詩云靖恭爾位正直是與神之
聽之式穀以汝故君子之交人也歡而不
媿和而不同好而不佞詐學而不虛行易
親而難媚多怨而寡非故無絕交無畔刃
書曰慎始而敬終以不困夫禮也者人之
急也可終身蹈而不可須臾離也須臾離

則悻慢之行臻焉須臾忘則悻慢之心生
焉况無禮而可以終始乎夫禮也者敬之
經也敬也者禮之情也無敬無以行禮無
禮無以節敬道不偏廢相須而行是故能
盡敬以從禮者謂之成人過則生亂亂則
災及其身昔晉惠公以慢端而無嗣文公
以肅命興國卻犇以傲享徵亡冀缺以敬
妻受服子圉以大明昭亂遠罷以既醉保

祿良霄以鶉奔喪家子展以草蟲昌族君子感凶德之如彼見吉德之如此故立必磬折坐必抱鼓周旋中規折旋中矩視不離乎結繪之間言不越乎表著之位聲氣可範精神可愛俯仰可宗揖讓可貴述作有方動靜有常帥禮不荒故爲萬夫之望也

脩本第三

人心莫不有理道至乎用之則異矣或用乎已或用乎人用乎已者謂之務本用乎人者謂之近末君子之理也先務其本故德建而怨寡小人之理也先近其末故功廢而讐多孔子之制春秋也詳內而略外急已而寬人故於魯也小惡必書於衆國也大惡始筆夫見人而不自見者謂之矇聞人而不自聞者謂之聵慮人而不自慮

者謂之瞽故明莫大乎自見聰莫大乎自
聞睿莫大乎自慮此三者舉之甚輕行之
甚邇而莫之知也故知者舉甚輕之事以
任天下之重行甚邇之路以窮天下之遠
故德彌高而基彌固勝彌衆而愛彌廣易
曰復亨出入無疾勿來無咎其斯之謂歟
君子之於已也無事而不懼焉我之有善
惟人之未吾好也我之有不善懼人之未

吾惡也見人之善懼我之不能脩也見人
之不善懼我之必若彼也故其嚮道止則
隅坐行則駮乘上懸乎冠綏下繫乎帶珮
晝也與之遊夜也與之息此盤銘之謂日
新易曰日新之謂盛德孔子曰弟子勉之
汝毋自舍人猶舍汝况自舍乎人逞汝其
遠矣故君子不恤年之將衰而憂志之有
倦不寢道焉不宿義矣夫行異乎言言之

錯也無周於智言異乎行行之錯也有傷
於仁是故君子務以行前言也人之過在
於哀死而不在於愛生在於悔往而不在
於懷來喜語乎已然好爭乎遂事墮於今
日而懈於後旬如斯以及於老故野人之
事不勝其悔君子之悔不勝其事孔子謂
子張曰師吾欲聞彼將以改此也聞彼而
不改此雖聞何益故書舉穆公之誓善變

也春秋書衛北宮括伐秦善攝也夫珠之
含礫瑾之挾瑕斯其性與良工爲之以純
其性若夫素然故觀二物之既純而知仁
德之可粹也優者取多焉劣者取少焉在
人而已孰禁我哉乘扁舟而濟者其身也
安粹大道而動者其業也美故詩曰追琢
其章金玉其相勉勉我王綱紀四方先民
有言明出乎幽著生乎微故宋井之霜以

基昇正之寒黃蘆之萌以飛大中之暑事
亦如之故君子修德始乎筭卅終乎鮒背
創乎夷原成乎喬嶽易曰升元亨用見大
人勿恤南征吉積小致大之謂也小人朝
為而夕求其成坐施而立望其反行一日
之善而求終身之譽譽不至則曰善無益
矣遂疑聖人之言背先王之教存其舊術
順其常好是以身辱名賤而不免為人役

也孔子曰小人何以壽為一日之不能善
矣久惡惡之甚也蓋人有大惑而不能自
知者舍有而思無也舍易而求難也身之
與家我之有也治之誠易而不肯為也人
之與國我所無也治之誠難而願之也雖
曰吾有術吾有術誰信之歟故懷疾者人
不使為醫行穢者人不使畫法以無驗也
子思曰能勝其心於勝人乎何有不能勝

其心如勝人何故一尺之錦足以見其巧
一仞之身足以見其治是以君子慎其寡
也道之於人也其簡且易耳其修之也非
若採金攻玉之涉歷艱難也非若求盈司
利之競逐囂煩也不要而邁不徵而盛四
時嘿而成不言而信德配乎天地功侔乎
四時名參乎日月此虞舜大禹之所以由
匹夫登帝位解布衣被文不者也故古語

曰至德之貴何往不遂至德之榮何往不
成後之君子雖不及行亦將至之云耳琴
瑟鳴不為無聽而失其調仁義行不為無
人而滅其道故絃絕而宮商亡身死而仁
義廢曾子曰士任重而道遠仁以為己任
不亦重乎死而後已不亦遠乎夫路不險
則無以知馬之良任不重則無以知人之
德君子自強其所重以取福小人日安其

所輕以取禍或曰斯道豈信哉曰何爲其不信也世之治也行善者獲福爲惡者得禍及其亂也行善者不獲福爲惡者不得禍變數也知者不以變數疑常道故循福之所自來防禍之所由至也遇不遇非我也其時也夫施吉報凶謂之命施凶報吉謂之幸守其所志而已矣易曰君子以致命遂志然行善而不獲福猶多爲惡而不獲禍猶少總夫二者豈可舍多而從少也曾子曰人而好善福雖未至禍其遠矣人而不好善禍雖未至福其遠矣故詩曰習習谷風惟山崔嵬何木不死何草不萎言盛陽布德之月草木猶有枯落而與時謬者况人事之應報乎故以歲之有凶穰而荒其稼穡者非良農也以利之有盈縮而棄其資貨者非良賈也以行之有禍福而

改其善道者非良士也詩云顯顯印印如
珪如璋令聞令望愷悌君子四方爲綱舉
珪璋以喻其德貴不變也

虛道第四

人之爲德其猶虛器歟器虛則物注滿則
止焉故君子常虛其心志恭其容貌不以
逸群之才加乎衆人之上視彼猶賢自視
猶不足也故人願告之而不倦易曰君子

以虛受人詩曰彼姝者子何以告之君子
之於善道也大則大識之小則小識之善
無大小咸載於心然後與而行之我之所
有既不可奪而我之所無又取於人是以
功常前人而人後之也故夫才敏過人未
足貴也博辯過人未足貴也勇決過人未
足貴也君子之所貴者遷善懼其不及改
惡恐其有餘故孔子曰顏氏之子其殆庶

幾乎有不善未嘗不知知之未嘗復行夫
惡猶疾也攻之則益悛不攻則日甚故君
子相求也非特與善也將以攻惡也惡不
廢則善不興自然之道也易曰比之匪人
不利君子貞大往小來陰長陽消之謂也
先民有言人之所難者二樂攻其惡者難
以惡告人者難夫惟君子然後能爲己之
所難能到人之所難致既能其所難也猶

恐舉人惡之輕而舍己惡之重君子患其
如此也故反之復之鑽之核之然後彼之
所懷者竭始盡知己惡之重矣既知己惡
之重者而不能取彼又將舍己况拒之者
乎夫酒食人之所愛者也而人相見莫不
進焉不吝於所愛者以彼之嗜之也使嗜
者甚於酒食人豈愛之故忠言之不出以
未有嗜之者也詩云匪言不能胡斯畏忌

目也者能遠察而不能近見其心亦如之
一本作能遠察天際而不能近見其背心亦如之君子誠知心之

似目也是以務鑒於人以觀得失故視不
過垣墻之裏而見邦國之表聽不過闕

門南旁木也之內而聞千里之外因人也人之

耳目盡為我用則我之聰明無敵於天下
矣是謂人一之我萬之人塞之我通之故
知其高不可為負其廣不可為方先王之

禮左史記事右史記言師曷誦詩庶僚箴

誨噐用載銘筵席書戒月考其為歲會其

行所以自供正也昔衛武公年過九十猶

夙夜不怠思聞訓道命其群臣曰無謂我

老耄而舍我必朝夕交戒又作抑詩以自

儆也衛人誦其德為賦淇澳且曰睿聖凡

興國之君未有不然者也故易曰君子以

恐懼修省下愚反此道也以為已既仁矣

智矣神矣明矣兼此四者何求乎衆人是
以辜罪昭著腥德發聞百姓傷心鬼神怨
痛曾不自聞愈休如也若有告之者則曰
斯事也徒生乎子心出乎子口於是刑焉
戮焉辱焉禍焉不能免則曰與我異德故
也未達我道故也又安足責是已之非遂
初之繆至於身危國亡可痛矣夫詩曰誨
爾諄諄聽之藐藐匪用爲敬覆用爲虐蓋

聞舜之在鄉黨也非家饋而戶贈之也人
莫不稱善焉象之在鄉黨也非家奪而戶
掠之也人莫不稱惡焉由此觀之人無賢
愚見善則譽之見惡則謗之此人情也未
必有私愛也未必有私憎也今夫立身不
爲人之所譽而爲人之所謗者未盡爲善
之理也盡爲善之理將若舜焉人雖與舜
不同其敢謗之乎故語稱救寒莫如重裘

止謗莫如修身療暑莫如親水信矣哉

貴驗第五

事莫貴乎有驗言莫棄乎無徵言之未有
益也不言未有損也水之寒也火之熱也
金石之堅剛也此數物未嘗有言而人莫
不知其然者信著乎其體也使吾所行之
信若彼數物而誰其疑我哉今不信吾所
行而怨人之不信也猶教人執鬼縛魅而

怨人之不得也惑亦甚矣孔子曰欲人之
信已也則微言而篤行之篤行之則用日
久用日久則事著明事著明則有目者莫
不見也有耳者莫不聞也其可誣哉故根
深而枝葉茂行久而名譽遠易曰恒亨無
咎利貞言久於其道也伊尹放太甲展季
覆寒女商魯之民不稱滌篡焉何則積之
於素也故染不積則人不觀其色行不積

則人不信其事子思曰同言而信信在言
前也同令而化化在令外也謗言也皆緣
類而作倚事而興加其似者也誰謂華岳
之不高江漢之不長與君子修德亦高而
長之將何患矣故求已而不求諸人非自
強也見其所存之富耳子思曰事自名也
聲自呼也貌自眩也物自處也人自官也
無非自己者故怨人之謂壅怨已之謂通

通也知所悛壅也遂所誤遂所誤也親戚
離之知所悔也疏遠附之疏遠附也常安
樂親戚離也常危懼自生民以來未有不
然者也殷紂為天子而稱獨夫仲尼為匹
夫而稱素王盡此類也故善釣者不易淵
而殉魚君子不降席而追道治乎八尺之
中而德化光矣古之人誦曰相彼玄鳥止
于陵阪仁道在近求之無遠人情也莫不

惡謗而卒不免乎謗其故何也非愛致力而不已之也已之之術反也謗之為名也逃之而愈至距之而愈來訟之而愈多明乎此則君子不足為也闇乎此則小人不足待也帝舜屢省禹拜昌言明乎此者也厲王蒙戮吳起刺之闇乎此者也皆書名前策著形列圖或為世法或為世戒可不慎之曾子曰或言予之善予惟恐其聞或

言予之不善惟恐過而見予之鄙色焉故君子服過也非徒飾其辭而已誠發乎中心形乎容貌其愛之也深其更之也速如追兔惟恐不逮故有進業無退功詩曰相彼脊令載飛載鳴我日斯邁而月斯征遷善不懈之謂也夫聞過而不改謂之喪心思過而不改謂之失體失體喪心之人禍亂之所及也君子舍旃周書有言人毋鑒

於水鑒於人也鑒也者可以察形言也者
可以知德小人恥其面之不及子都也君
子恥其行之不如堯舜也故小人尚明鑒
君子尚至言至言也非賢友則無取之故
君子必求賢友也詩曰伐木丁丁鳥鳴嚶
嚶出自幽谷遷于喬木言朋友之義務在
切直以升於善道者也故君子不友不如
己者非羞彼而大我也不如己者須己而

植者也然則扶人不暇將誰相我哉吾之
債也亦無日矣故債則縱多友邪則已
僻也是以君子慎取友也孔子曰居而得
賢友福之次也夫賢者言足聽貌足象行
足法加乎善獎人之美而好攝人之過其
不隱也如影其不諱也如響故我之憚之
若嚴君在堂而神明處室矣雖欲爲不善
其敢乎故求益者之居遊也必近所畏而

遠所易詩云無棄爾輔員于爾輻屢顧爾
僕不輸爾載親賢求助之謂也

責言第六

君子必貴其言貴其言則尊其身尊其身
則重其道重其道所以立其教言費則身
賤身賤則道輕道輕則教廢故君子非其
人則弗與之言若與之言必以其方農夫
則以稼穡百工則以技巧商賈則以貴賤
府史則以官守大夫及士則以法制儒生
則以學業故易曰艮其輔言有序不失事
中之謂也若夫父慈子孝姑愛婦順兄友
弟恭夫敬妻聽朋友必信師長必教有司
日月慮知乎州閭矣雖庸人則亦循循然
與之言此可也過此而往則不可也故君
子之與人言也使辭足以達其知慮之所
至事足以合其性情之所安弗過其任而

強牽制也苟過其任而強牽制則將昏瞶
委滯而遂疑君子以為欺我也不則曰無
聞知矣非故也明偏而示之以幽弗能照
也聽寡而告之以微弗能察也斯所資於
造化者也雖曰無訟其如之何故孔子曰
可與言而不與之言失人不可與言而與
之言失言知者不失人亦不失言夫君子
之於言也所致貴也雖有夏后之璜商湯
之駟弗與易也今以施諸俗士以為志誣
而弗貴聽也不亦辱已而傷道乎是以君
子將與人語大本之源而談性義之極者
必先度其心志本其器量視其銳氣察其
墮衰然後唱焉以觀其和導焉以觀其隨
隨和之徵發乎音聲形乎視聽著乎顏色
動乎身體然後可以發而步遠功察而
治微於是乎闡張以致之因來以進之審

諭以明之雜稱以廣之立準以正之疏煩
以理之疾而勿迫徐而勿失雜而勿結放
而勿逸欲其自得之也故大禹善治水而
君子善導人導人必因其性治水必因其
勢是以功無敗而言無弃也荀卿曰禮恭
然後可與言道之方辭順然後可與言道
之理色從然後可與言道之致有事氣者
勿與辨也孔子曰惟君子然後能貴其言

貴其色小人能乎哉仲尼荀卿先後知之
問者曰或有周乎上哲之至論通乎大聖
之洪業而好與俗士辨者何也曰以俗士
爲必能識之故也何以驗之使彼有金石
絲竹之樂則不奏乎聾者之側有山龍華
蟲之文則不陳乎瞽者之前知聾者之不
聞也知瞽者之不見也於己之心分數明
白至與俗士而獨不然者知分數者不明

也不明之故何也夫俗士之牽達人也猶
鶉鳥之欺孺子也鶉鳥之性善近人飛不
峻也不速也蹲蹲然似若將可獲也卒至
乎不可獲是孺子之所以踟蹰蹠足而不
以爲弊也俗士之與達人言也受之雖不
肯拒之則無說然而有贊焉有和焉若將
可寤卒至乎不可寤是達人之所以乾唇
竭聲而不舍也斯人也固達之蔽者而非
達之達者也雖能言之猶夫俗士而已矣
非惟言也行亦如之得其所則尊榮失其
所則賤辱昔倉梧丙娶妻美而以與其兄
欲以爲讓也則不如無讓焉尾生與婦人
期於水邊水暴至不去而死欲以爲信也
則不如無信焉葉公之黨其父攘羊而子
證之欲以爲直也則不如無直焉苾仲子
不食母兄之食出居於陵欲以爲潔也則

不如無潔焉宗魯受齊豹之謀死孟縶之
難欲以為義也則不如無義焉故九道蹈
之既難錯之益不易是以君子慎諸已以
為往鑒焉

藝紀第七

藝之興也其由民心之有智乎造藝者將
以有理乎民生而心知物知物而欲作欲
作而事繁事繁而莫之能理也故聖人因

智以造藝因藝以立事二者近在乎身而
遠在乎物藝者所以旌智飾能統事御群
也聖人之所不能已也

一本作聖人
無所不能也

所以事成德者也德者以道率身者也藝
者德之枝葉也德者人之根幹也斯二物
者不偏行不獨立木無枝葉則不能豐其
根幹故謂之癩人無藝則不能成其德故
謂之野若欲為夫君子必兼之乎先王之

欲人之爲君子也故立保民掌教六藝一
曰五禮二曰六樂三曰五射四曰五御五
曰六書六曰九數教六儀一曰祭祀之容
二曰賓客之容三曰朝廷之容四曰喪紀
之容五曰軍旅之容六曰車馬之容大胥
掌學士之版春入學舍采合萬舞秋班學
合聲諷誦講習不解於時故詩曰菁菁者
莪在彼中阿旣見君子樂且有儀美育

材其猶人之於藝乎旣脩其質且加其文
文質著然後體全體全然後可登乎清廟
而可羞乎王公故君子非仁不立非義不
行非藝不治非容不莊四者無愆而聖賢
之器就矣易曰富有之謂大業其斯之謂
歟君子者表裏稱而本末度者也故言貌
稱乎心志藝能度乎德行美在其中而暢
於四支純粹內實光輝外著孔子曰君子

恥有其服而無其容恥有其容而無其辭
恥有其辭而無其行故寶玉之山草木必
潤盛德之士文藝必衆昔在周公嘗猶豫
於斯矣孔子稱安上治民莫善於禮移風
易俗莫善於樂存乎六藝者著其末節也
謂夫陳籩豆置尊俎執羽籥擊鐘磬升降
趨翔屈伸俯仰之數也非禮樂之本也禮
樂之本也者其德音乎詩云我有嘉賓德

音孔昭視民不訕君子是則是效我有旨
酒嘉賓式宴以敖此禮樂之所貴也故恭
恪廉讓藝之情也中和平直藝之實也齊
敏不匱藝之華也威儀孔時藝之飾也通
乎群藝之情實者可與論道識乎群藝之
華飾者可與講事事者有司之職也道者
君子之業也先王之賤藝者蓋賤有司也
君子兼之則貴也故孔子曰志於道據於

德依於仁游於藝藝者心之使也仁之聲也義之象也故禮以考敬樂以敦愛射以平志御以和心書以綴事數以理煩敬考則民不慢愛敦則群生悅志平則怨尤亡心和則離德睦事綴則法戒明煩理則物不悖六者雖殊其致一也其道則君子專之其事則有司共之此藝之大體也

禮記卷第八

禮記卷第八

禮記卷第八

俗士之所謂辯者非辯也非辯而謂之辯者蓋聞辯之名而不知辯之實故目之妄也俗之所謂辯者利口者也彼利口者苟美其聲氣繁其辭令如激風之至如暴雨之集不論是非之性不識曲直之理期於不窮務於必勝以故淺識而好奇者見其如此也固以為辯不知木訥而達道者雖口屈而心不服也夫辯者求服人心也非

屈人口也故辯之爲言別也爲其善分別
事類而明處之也非謂言辭切給而以陵
蓋人也故傳稱春秋微而顯婉而辯者然
則辯之言必約以至不煩而論疾徐應節
不犯禮教足以相稱樂盡人之辭善致人
之志使論者各盡得其願而與之得解其
稱也無其名其理也不獨顯若此則可謂
辯故言有拙而辯者焉有巧而不辯者焉

君子之辯也欲以明大道之中也是豈取
一坐之勝哉人心之於是非也如口於味
也口者非以已之調膳則獨美而與人調
之則不美也故君子之於道也在彼猶在
已也苟得其中則我心悅焉何擇於彼苟
失其中則我心不悅焉何取於此故其論
也遇人之是則止矣遇人之是而猶不止
苟言苟辯則小人也雖美說何異乎鴟之

好鳴鐸之喧譁哉故孔子曰小人毀譽以
為辯絞急以為智不遜以為勇斯乃聖人
所惡而小人以為美豈不哀哉夫利口之
所以得行乎世也蓋有由也且利口者心
足以見小數言足以盡巧辭給足以應切
問難足以斷俗疑然而好說而不倦諛諛
如也夫類族辯物之士者寡而愚闇不達
之人者多孰知其非乎此其所無用而不
見廢也至賤而不見遺也先王之法折言
破律亂名改作者殺之行僻而堅言偽而
辯記醜而博順非而澤者亦殺之為其疑
衆惑民而潰亂至道也孔子曰巧言亂德
惡似而非者也

智行第九

或問曰士或明哲窮理或志行純焉二者
不可兼聖人將何取對曰其明哲乎夫明

哲之爲用也乃能殷民阜利使萬物無不
盡其極者也聖人之可及非徒空行也智
也伏羲作八卦文王增其辭斯皆窮神知
化豈徒特行善而已乎易離象稱大人以
繼明照於四方且大人聖人也其餘象皆
稱君子蓋君子通於賢者也聰明惟聖人
能盡之大才通人有而不能盡也書美唐
堯欽明爲先驩兜之舉共工四嶽之薦鯀

堯知其行衆尚未知信也若非堯則裔土
多凶族兆民長愁苦矣明哲之功也如是
子將何從或曰俱謂賢者耳何乃以聖人
論之對曰賢者亦然人之行莫大於孝莫
顯於清曾參之孝有虞不能易原憲之清
伯夷不能間然不得與游復列在四行之
科以其才不如也仲尼問子貢曰汝與回
也孰愈對曰賜也何敢望回回也聞一以

知十賜也聞一以知二子貢之行不若顏淵遠矣然而不服其行服其聞一知十由此觀之盛才所以服人也仲尼亦奇顏淵之有盛才也故曰回也非助我者也於吾言無所不說顏淵達於聖入之情故無窮難之辭是以能獨獲亶亶之譽為七十子之冠曾參雖質孝原憲雖體清仲尼未甚嘆也或曰苟有才智而行不善則可取乎

對曰何子之難喻也水能勝火豈一升之水灌一林之火哉柴也愚何嘗自投於井夫君子仁以博愛義以除惡信以立情禮以自節聰以自察明以觀色謀以行權智以辨物豈可無一哉謂夫多少之間耳且管仲背君事雙言奢而失禮使桓公有九合諸侯一匡天下之功仲尼稱之曰微管仲吾其被髮左衽矣召忽伏節死難人臣之

美義也仲尼比爲匹夫匹婦之爲諒矣是故聖人貴才智之特能立功立事益於世矣如愆過多才智少作亂有餘而立功不足仲尼所以避陽貨而誅少正卯也何謂可取乎漢高祖數賴張子房權謀以建帝業四皓雖美行而何益夫倒懸此固不可同日而論矣或曰然則仲尼曰未知焉得仁乃高仁耶何謂也對曰仁固大也然則

仲尼此亦有所激然非專小智之謂也若有人相語曰彼尚無有一智也安得乃知爲仁乎昔武王崩成王幼周公居攝管蔡啓殷畔亂周公誅之成王不達周公恐之天乃雷電風雨以彰周公之德然後成王寤成王非不仁厚於骨肉也徒以不聰睿之故助畔亂之人幾喪周公之功而墜文武之業召公見周公之既反政而猶不知

疑其貪位周公爲之作君奭然後悅夫以
召公懷聖之資而猶若此乎末業之士苟
失一行而智略褊短亦可懼矣仲尼曰可
與立未可與權孟軻曰子莫執中執中無
權猶執一也仲尼孟軻可謂達於權智之
實者也殷有三仁微子介於石不終日箕
子內難而能正其志比干諫而剖心君子
以微子爲上箕子次之比干爲下故春秋
大夫見殺皆譏其不能以智自免也且徐
偃王知脩仁義而不知用武終以亡國魯
隱公懷讓心而不知佞僞終以致殺宋襄
公守節而不知權終以見執晉伯宗好直
而不知時變終以隕身叔孫豹好善而不
知擇人終以凶餓此皆蹈善而少智之謂
也故大雅貴旣明且哲以保其身大明哲
之士者威而不懼困而能通決嫌疑辨

物居方讓禍於忽杪求福於未萌見變事
則達其機得經事則循其常巧言不能推
令色不能移動作可觀則出辭爲師表比
諸志行之士不亦謬乎

爵祿第十

或問古之君子貴爵祿歟曰然諸子之書
稱爵祿非貴也資財非富也何謂乎曰彼
遭世之亂見小人富貴而有是言非古也

古之制爵祿也爵以居有德祿以養有功
功大者祿厚德遠者爵尊功小者其祿薄
德近者其爵卑是故觀其爵則別其人之
德也見其祿則知其人之功也不待問之
古之君子貴爵祿者蓋以此也非以黼黻
華乎其身芻豢之適於其口也非以美色
悅乎其目鐘鼓之樂乎其耳也孔子曰邦
有道貧且賤焉恥也明王在上序爵班祿

而不以逮也君子以為至羞何賤之有乎
先王將建諸侯而錫爵祿也必於清廟之
中陳金石之樂宴賜之禮宗人擯相內史
作策也其頌曰文王既勤止我應受之敷
時繹思我祖維求定時周之命於繹思由
此觀之爵祿者先王之所重也非所輕也
故書曰無曠庶官天工人其代之爵祿之
賤也由虛之者不宜也賤其人斯賤其位

矣其貴也由處之者宜之也貴其人斯貴
其位矣詩云君子至止黻衣綉裳佩玉璜
鏘壽考不忘黻衣綉裳君子之所服也
其德故美其服也暴亂之君子非無此服
也而民弗美也位亦如之昔周公相王室
以君天下聖德昭聞王勛弘大成王封以
少昊之墟地方七百里錫之山川土田附
庸備物典策官司彝器龍旗九旒祀帝於

郊太公亮武王克商寧亂王封之爽鳩氏
之墟東至於海西至於河南至於穆陵北
至於無棣五侯九伯汝實征之世祚太師
撫寧東夏富此之時孰謂富貴不為榮寵
者乎自時厥後文武之教衰黜陟之道廢
諸侯僭恣大夫世位爵人不以德祿人不
以功竊國而貴者有之竊地而富者有之
姦邪得願仁賢失志於是則以富貴相詬

病矣故孔子曰邦無道富且貴焉恥也然
則富貴美惡存乎其世也易曰聖人之大
寶曰位何以爲聖人之大寶曰位位也者
立德之機也勢也者行義之杼也聖人蹈
機握杼織成天地之化使萬物順焉人倫
正焉六合之內各竟其願其爲大寶不亦
宜乎故聖人以無勢位爲窮百工以無器
用爲困困則其資亡窮則其道廢故孔子

栖栖而不居者蓋憂道廢故也易曰井渫
不食爲我心恻可用汲王明並受其福夫
登高而建旌則其所視者廣矣順風而振
鐸則其所聞者遠矣非旌色之益明鐸聲
之益遠也所託者然也况居富貴之地而
行其政令者也故舜爲匹夫猶民也及其
受終於文祖稱曰予一人則西王母來獻
白環周公之爲諸侯猶臣也及其踐明堂
之祚負斧戣而立則越裳氏來獻白雉故
身不尊則施不光居不高則化不博易曰
豐亨無咎王假之勿憂宜日中身尊居高
之謂也斯事也聖人之所務也雖然求之
有道得之有命舜禹孔子可謂求之有道
矣舜禹得之孔子不得之可謂有命矣非
惟聖人賢者亦然稷契伯益伊尹傳說得
之者也顏淵閔子騫冉耕仲弓不得者也

故良農不患壇場之不修而患風雨之不
節君子不患道德之不建而患時世之不
遇詩曰駕彼四牡四牡項領我瞻四方感
寃靡所騁傷道之不遇也豈一世哉豈一
世哉

徐幹中論卷之上

徐幹中論卷之下

考偽第十一

仲尼之沒于今數百年矣其間聖人不作
唐虞之法微三代之教息大道陵遲人倫
之中不定於是感世盜名之徒因夫民之
離聖教日久也生邪端造異術假先王之
遺訓以緣飾之文同而實違貌合而情遠
自謂得聖人之真也各兼說特論誣謠一

世之人誘以偽成之名懼以虛至之謗使人憧憧乎得亡。愒愒而不定。喪其故性而不自知其迷也。咸相與祖述其業而寵狎之。斯術之於斯民也。猶內關之疾也。非有痛癢煩苛於身。情志慧然。不覺疾之已深也。然而期日既至。則血氣暴竭。故內關之疾。疾之中天。而扁鵲之所甚惡也。以盧醫不能別而逝之者。不能攻也。昔揚朱墨翟

申不害。韓非。田駢。公孫龍。汨亂乎先王之道。譎張乎戰國之世。然非人倫之大患也。何者。術異乎聖人者。易辨而從之者不多也。今爲名者之異乎聖人也。微視之難見。世莫之非也。聽之難聞。世莫之舉也。何則。勤遠以自旌。託之乎疾。固廣求以合衆。託之乎仁愛。枉直以取舉。託之乎隨時。屈道以弭謗。託之乎畏愛。多識流俗之故。靡誦

詩書之文。託之乎博文。飾非而言好。無倫而辭察。託之乎通理。居必人才。遊必帝都。託之乎觀風。然而好變易姓名。求之難獲。託之乎能靜。卑屈其體。輯柔其頤。託之乎溫恭。然而時有距絕。擊斷嚴厲。託之乎獨立。獎誦童蒙。訓之以已術。託之乎勤誨。金玉自待。以神其言。託之乎說道。其大抵也。苟可以收名。而不必獲實。則不去也。可以獲實。而不必收名。則不居也。汲汲乎常懼。當時之不我尊也。皇皇爾。又懼來世之不我尚也。心疾乎內。形勞於外。然其智調足以將之。便巧足以莊之。稱託比類。足以充之。文辭聲氣。足以飾之。是以欲所如讓。躁而如靜。幽而如明。跛而如正。考其所由來。則非堯舜之律也。核其所自出。又非仲尼之門也。其回適而不度。窮涸而無源。不可

經方致遠。甄物成化。斯乃巧人之雄也。而

偽夫之傑也。然中才之徒。咸拜手而贊之。

揚聲以和之。被死而後論其遺烈。被害而猶恨已

不逮。悲夫人之陷溺。蓋如此乎。孔子曰。不

患人之不已知者。雖語我曰。吾為善。吾不

信之矣。何者。以其泉不自中涌而注之者。

從外來也。苟如此。則處道之心不明。而執

義之意不著。雖依先王稱詩書。將何益哉。

以此毒天下之民。莫不離本趣末。事以偽

成。紛紛擾擾。馳騖不已。其流于世也。至於

父盜子名。兄竊弟譽。骨肉相詬。朋友相詐。

此大亂之道也。故求名者。聖人至禁也。昔

衛公孟多行無禮。取憎於國人。齊豹殺之。

以為名。春秋書之曰盜。其傳曰。是故君子

動則思禮。行則思義。不為利回。不為義疚。

或求名而不得。或欲蓋而名章。懲不義也。

或求名而不得。或欲蓋而名章。懲不義也。

齊豹為衛司寇守嗣大夫作而不義其書
為盜邾廢其莒牟夷邾黑肱以土出求
食而已不求其名賤而必書此二物者所
以懲肆而去貪也若艱難其身以險危大
人而有名章徹攻難之士將奔走之若竊
邑叛君以徼大利而無名貪冒之民將寘
力焉是以春秋書齊豹曰盜三叛人名以
懲不義數惡無禮其善志也問者曰齊豹

之殺人以為己名故仲尼惡而盜之今為
名者豈有殺之罪耶曰春秋之中其殺人
者不為少然而不盜不已聖人之善惡也
必權輕重數衆寡以定之夫為名者使真
偽相冒是非易位而民有所化此邦家之
大災也殺人者一人之害也安可相比也
然則何取於殺人者以書盜乎荀卿亦曰
盜名不如盜貨鄉愿亦無殺人之罪也而

仲尼惡之何也以其亂德也今僞名者之
亂德也豈徒鄉愿之謂乎萬事雜錯變數
滋生亂德之道固非一端而已書曰靜言
庸違象恭滔天皆亂德之類也春秋外傳
曰姦仁為佻姦禮為羞姦勇為賊天仁禮
勇道之美者也然行之不以其正則不免
乎大惡故君子之於道也審其所以守之
慎其所以行之問者曰仲尼惡歿世而名

不稱又疾僞名然則將何執曰是安足怪
哉名者所以名實也實立而名從之非名
立而實從之也故長形立而名之曰長短
形立而名之曰短非長短之名先立而長
短之形從之也仲尼之所貴者名實之名
也貴名乃所以貴實也夫名之繫於實也
猶物之繫於時也物者春也吐華夏也布
葉秋也凋零冬也成實斯無為而自成者

也若強爲之則傷其性矣名亦如之故僞
名者皆欲傷之者也人徒知名之爲善不
知僞善者爲不善也惑甚矣求名有三少
而求多遲而求速無而求有此三者不僻
爲幽昧離乎正道則不獲也固非君子之
所能也君子者能成其心心成則內定內
定則物不能亂物不能亂則獨樂其道獨
樂其道則不聞爲聞不顯爲顯故禮稱君
子之道闇然而日彰小人之道的然而日
亡君子之道淡而不厭簡而文溫而理知
遠之近知風之自知微之顯可與入德矣
君子之不可及者其惟人之所不見乎夫
如是者豈將反側於亂世而化唐人之未
稱哉

謹交第十二

民之好交游也不及聖王之世乎古之不

交游也將以自求乎昔聖王之治其民也
任之以九職糾之以八刑導之以五禮訓
之以六樂教之以三物習之以六容使民
勞而不至於困逸而不至於荒當此之時
四海之內進德脩業勤事而不曠詎敢滯
心舍力作爲非務以害休功者乎自王公
至於列士莫不戒正畏相厥職有恭不敢
自暇自逸故春秋外傳曰天子大采朝日

與三公九卿祖識地德日中考政與百官
之政事師尹惟旅牧相宣序民事少采夕
月與太史司載糾虔天刑日入監九御潔
奉禘郊之粢盛而後即安諸侯朝修天子
之業命晝考其國職夕省其典刑夜警其
百工使無惰滯而後即安卿大夫朝考其
職晝講其庶政夕序其業夜庀其家事而
後即安士朝而受業晝而講貫夕而習復

夜而計過無憾而後即安正歲使有司令
於官府曰各修乃職考乃法備乃事以聽
王命其有不恭則邦有大刑由此觀之不
務交游者非政之惡也心存於職業而不
遑也且先王之教官既不以交游導民而
鄉之考德又不以交游舉賢是以不禁其
民而民自舍之及周之衰而交游興矣問
者曰吾子著書稱君子之有交求賢交也

今稱文非古也然則古之君子無賢交歟
曰異哉子之不通於大倫也若夫不出戶
庭坐於空室之中雖魑魅魍魎將不吾覩
而况乎賢人乎今子不察吾所謂交游之
實而難其名名有同而實異者矣名有異
而實同者矣故君子於是倫也務於其實
而無譏其名吾稱古之不交游者不謂嚮
屋漏而居也今之好交游者非謂長沐雨

乎中路者也古之君子因王事之聞則奉
贄以見其同僚及國中之賢者其於宴樂
也言仁義而不及名利君子未命者亦因
農事之隙奉贄以見其鄉黨同志及夫古
之賢者亦然則何為其不獲賢交哉非有
釋王事廢交業遊遠邦曠年歲者也故古
之交也近今之交也遠古之交也寡今之
交也衆古之交也為求賢今之交也為名

利而已矣古之立國也有四民焉執契脩
版圖奉聖王之法治禮義之中謂之士竭
力以盡地利謂之農夫審曲直形勢飭五
材以別民器謂之百工通四方之珍異以
資之謂之商旅各世其事毋遷其業少而
習之其心安之則若性然而功不休也故
其處之也各從其族不使相奪所以一其
耳目也不勤乎四職者謂之窮民役諸園

土凡民出入行止會聚飲食皆有其節不
得怠荒以妨生務以麗罪罰然則安有群
行方外而專治交游者乎是故五家比
使之相保比有長五比爲閭使之相憂閭
有胥四閭爲族使之相葬族有師五族爲
黨使之相救黨有正五黨爲州使之相調
州有長五州爲鄉使之相賓鄉有大夫必
有聰明慈惠之人使各掌其鄉之政教禁

令正月之吉受法于司徒退而頒之于其
州黨族閭比之群吏使各以教其所治之
民以考其德行察其道藝以歲時登其大
夫察其衆寡凡民之有德行道藝者比以
告閭閭以告族族以告黨黨以告州州以
告鄉鄉以告民有罪奇袤者比以告亦如
之有善而不以告謂之蔽賢蔽賢有罰有
惡而不以告謂之黨逆黨逆亦有罰故民

不得有遺善亦不得有隱惡鄉大夫三年
則大比而興賢能者鄉老及鄉大夫群吏
獻賢能之書於王王拜受之登於天府其
爵之命也各隨其才之所宜不以大司小
不以輕任重故書曰日僚師師百工惟時
此先王取士官人之法也故其民莫不反
本而自求慎德而積小知福祚之來不由
於人也故無交游之事無請託之端心澄
體靜恬然自得咸相率以正道相厲以誠
慤姦說不興邪陂自息矣世之衰矣上無
明天子下無賢諸侯君不識是非臣不辨
黑白取士不由於鄉黨考行不本於閭閻
多助者為賢才寡助者為不肖序爵聽無
證之論班祿采方國之諫民見其如此者
知富貴可以從衆為也知名譽可以虛譁
獲也乃離其父兄去其邑里不脩道藝不

治德行講偶時之說結比周之黨汲汲皇
皇無日以處更相歎揚迭爲表裏檮杌生
華憔悴布衣以欺人主惑宰相竊選舉盜
榮寵者不可勝數也旣獲者賢已而遂往
羨慕者並驅而追之悠悠皆是孰能不然
者乎桓靈之世其甚者也自公卿大夫州
牧郡守王事不恤賓客爲務冠蓋填門儒
服塞道飢不暇餐倦不獲已殷殷沅沅俾
夜作晝下及小司列城墨綬莫不相商以
得人自矜以下士星言夙駕送往迎來亭
傳常滿吏卒傳問炬火夜行閭寺不閉把
臂捩腕扣天矢誓推託恩好不較輕重文
書委於官曹繫囚積於囹圄而不遑省也
詳察其爲也非欲憂國恤民謀道講德也
徒營已治私求勢逐利而已有策名於朝
而稱門生於富貴之家者比屋有之爲之

師而無以教弟子亦不受業然其於事也
至乎懷丈夫之容而襲婢妾之態或奉貨
而行賂以自固結求志屬託規圖仕進然
擲目指掌高談大語若此之類言之猶可
羞而行之者不知恥嗟乎王教之敗乃至
於斯乎且夫交游者出也或身歿於他邦
或長幼而不歸父母懷莞獨之思室人抱
東山之哀親戚隔絕閨門分離無罪無辜
而亡命是效古者行役過時不反猶作詩
刺怨故四月之篇稱先祖匪人胡寧忍予
又况無君命而自為之者乎以此論之則
交游乎外久而不歸者非仁人之情也

曆數第十三

昔者聖王之造曆數也察紀律之行觀運
機之動原星辰之迭中寤晷景之長短於
是營儀以准之立表以測之下漏以考之

布筭以追之然後元首齊乎上中朔正乎
下寒暑順序四時不忒夫曆數者先王以
憲殺生之期而詔作事之節也使萬國之
民不失其業者也昔少皞氏之衰也九黎
亂德民神雜揉不可方物顓頊受之乃命
南正重司天以屬神北正黎司地以屬民
使復舊常毋相侵黷其後三苗復九黎之
德堯復育重黎之後不忘舊者使復典教
之故書曰乃命羲和欽若昊天曆象日月
星辰敬授民時於是陰陽調和災厲不作
休徵時至嘉生蕃育民人樂康鬼神降福
舜禹受之循而勿失也及夏德之衰而羲
和湏臾廢時亂日湯武革命始作曆明時
敬順天數故周禮太史之職正歲年以序
事頒之於官府及都鄙頒告朔於邦國於
是分至啓閉之日人君親登觀臺以望氣

而書雲物爲備者也故周德旣衰百度墮
替而曆數失紀故魯文公元年閏三月春
秋譏之其傳曰非禮也先王之正時也履
端於始舉正於中歸餘於終履端於始序
則不愆舉正於中民則不惑歸餘於終事
則不悖又哀公十二年十二月螽季孫問
諸仲尼仲尼曰丘聞之也火復而後蟄者
畢今火猶西流司曆過也言火未伏明非

立冬之日自是之後戰國構兵更相吞滅
專以爭強攻取爲務是以曆數廢而莫脩
浸用乖繆大漢之興海內新定先王之禮
法尚多有所缺故因秦之制以十月爲歲
首曆用顓頊孝武皇帝恢復王度率由舊
章招五經之儒徵術數之士使議定漢曆
及更用鄧平所治元起太初然後分至啓
閉不失其節弦望晦朔可得而驗成哀之

問劉歆用平術而廣之以爲三統曆比之
衆家最爲備悉至孝章皇帝年曆踈濶不
及天時及更用四分曆舊法元起庚辰至
靈帝四分曆猶復後天
半日於是會
稽都尉劉洪更造乾象曆以追日月星辰
之行考之天文於今爲密會宮車宴駕京
師大亂事不施行惜哉上觀前化下迄於
今帝王興作未有奉贊天時以經人事者
也故孔子制春秋書人事而因以天時以
明二物相須而成也故人君不在分至啓
閉則不書其時月蓋刺怠慢也夫曆數者
聖人之所以測靈耀之曠而窮玄妙之情
也非天下之至精孰能致思焉今麤論數
家舊法綴之於篇庶爲後之達者存損益
之數云耳

或問孔子稱仁者壽而顏淵早夭積善之家必有餘慶而比干子胥身陷大禍豈聖人之言不信而欺後人耶故司空穎川荀爽論之以爲古人有言死而不朽謂太上立德其次有功其次有立言其身歿矣其道猶存故謂之不朽夫形體者人之精魄也德義令聞者精魄之榮華也君子愛其形體故以成其德義也夫形體固自

朽弊消亡之物壽與不壽不過數十歲德義立與不立差數千歲豈可同日言也哉顏淵時有百年之人今寧復知其姓名耶詩云萬有千歲眉壽無有害人豈有萬壽千歲者皆令德之謂也由此觀之仁者壽豈不信哉傳曰所好有甚於生者所惡有甚於死者比干子胥皆重義輕死者也以其所輕獲其所重求仁得仁可謂慶矣槌

鍾擊磬所以發其聲也煮鬯燒董所以揚其芬也賢者之窮厄戮辱此槌擊之意也其死亡陷溺此燒煮之類也北海孫翹以爲死生有命非他人之所致也若積善有慶行仁得壽乃教化之義誘人而納於善之理也若曰積善不得報行仁者凶則愚惑之民將走千惡一作移其性以反天常故曰民可使由之不可使知之身體髮膚受之

父母不敢毀傷孝之至也若夫求名之徒殘疾厥體冒厄危戮以徇其名則曾參不爲也子胥違君而適讐國以雪其恥與父報讐悖人臣之禮長畔弑之原又不深見二主之異量至於懸首不化斯乃凶之大者何慶之爲幹以爲二論皆非其理也故作辨天壽云幹聞先民稱所惡於知者爲鑿也不其然乎是以君子之爲論也必原

事類之宜而循理焉故曰說成而不可間也義立而不可亂也若無二難者苟既違本而死又不以其實夫聖人之言庶幾矣大矣變化云爲固不可以一槩齊也今將妄舉其目以明其非夫壽有三有王澤之壽有聲聞之壽有行仁之壽書曰五福一曰壽此王澤之壽也詩云其德不爽壽考不忘此聲聞之壽也孔子曰仁者壽此行仁

之壽也孔子云爾者以仁者壽利養萬物萬物亦受利矣故必壽也荀氏以死而不朽爲壽則書何故曰在昔殷王中宗嚴恭寅畏天命自度治民祗懼不敢荒寧肆中宗之享國七十有五年其在高宗寔舊勞於外爰暨小人作其即位乃或亮陰三年不言惟言乃雍不敢荒寧嘉靖殷國至於小大無時或怨肆高宗之享國五十有九

年其在祖甲不義惟王舊為小人作其即位爰知小人之依能保惠庶民不侮鰥寡肆祖甲之享國三十有三年自時厥後立王生則逸不知稼穡之難艱不知小人之勞苦惟耽樂是從自時厥後亦罔或克壽或十年或七八年或五六年或三四年者周公不知夭壽之意乎故言聲聞之壽者不可同於聲聞是以達人必參之也孫氏

專以王教之義也惡愚惑之民將反天常孔子何故曰有殺身以成仁無求生以害仁又曰自古皆有死民無信不立欲使知去食而必死也昔者仲尼乃欲民不仁不信乎夫聖人之教乃為明允君子豈徒為愚惑之民哉愚惑之民威以斧鉞之戮懲以刀墨之刑遷之他邑而流於裔土猶或不悛况以言乎故曰惟上智與下愚不移

然則荀孫之義皆失其情亦可知也昔者
帝嚳已前尚矣唐虞三代厥事可得略乎
聞自堯至於武王自稷至於周召皆仁人
也君臣之數不爲少矣考其年壽不爲天
矣斯非仁者壽之驗耶又七十子豈殘酷
者哉顧其仁有優劣耳其夭者惟顏回據
一顏回而多疑其餘無異以一鈎之金權
於一車之羽云金輕於羽也天道迂濶闇
昧難明聖人取大略以爲成法亦安能委
曲不失毫芒無差跌乎且夫信無過於四
時而春或不華夏或隕霜秋或雨雪冬或
無冰豈復以爲難哉所謂禍者已欲違之
而反觸之者也比干子胥已知其必然而
樂爲焉天何罪焉天雖欲福仁人亦不
能以手臂引人而亡之非所謂無處也苟
令以此設難而解以槌擊燒薰於事無施

孫氏譏比干子胥亦非其理也殷有三仁
比干居一何必啓手然後爲德子胥雖有
讐君之過猶有觀心知仁懸首不化固臣
之節也且夫賢人之道者同歸而殊途一
致而百慮或見危而授命或望善而遐舉
或被髮而狂歌或三黜而不去或辭聘而
山棲或忍辱而俯就豈得責以聖人也哉
於戲通節之士實關斯事其審之云耳

務本第十五

人君之大患也莫大於詳於小事而略於
大道察其近物而闇於遠圖故自古及今
未有如此而不亂也未有如此而不亡也
夫詳於小事而察於近物者謂耳聽乎絲
竹歌謠之和目視乎琯珠采色之辛口給
乎辯慧切對之辭心通乎短言小說之文
手習乎射御書數之巧體務焉乎俯仰折旋

之容凡此者觀之足以盡人之心學之足以動人之志且先王之末教也非有小才小智則亦不能爲也是故能爲之者莫不自悅乎其事而無取於人以人皆不能故也夫居南面之尊秉生殺之權者其勢固足以勝人也而加以勝人之能懷是已之心誰敢犯之者乎以匹夫行之猶莫之敢覩也而况人君哉故罪惡若山而已不見也謗聲若雷而已不聞也豈不甚矣乎夫小事者味甘而大道者醇淡近物者易驗而遠數者難效非大明君子則不能兼通者也故皆惑於所甘而不能至乎所淡眩於所易而不能反於所難是以治君世寡而亂君世多也故人君之所務者其在大道遠數乎大道遠數者爲仁足以覆後疇群生惠足以撫養百姓明足以照見四方智

足以統理萬物權足以變應無端義足以
阜生財用威足以禁遏姦非武足以平定
禍亂詳於聽受而審於官人達於典廢之
原通於安危之分如此則君道畢矣夫人
君非無治為也失所先後故也道有本末
事有輕重聖人之異乎人者無他焉蓋如
此而已矣魯桓公容貌美麗且多技藝然
而無君才大智不能以禮防正其母使與
齊侯淫亂不絕驅馳道路故詩刺之曰猗
嗟名兮美目清兮儀既成兮終日射侯不
出正兮展我甥兮下及昭公亦善有容儀
之習以亟其朝晉也自郊勞至於贈賄禮
無違者然而不恤國政政在大夫弗能取
也子家羈賢而不能用也奸大國之明禁
凌虐小國利人之難而不知其私公室四
分民食其他思莫在於公不圖其終卒有

出奔之禍春秋書而絕之曰公孫於齊次
於陽州故春秋外傳曰國君者服寵以為
美安民以為樂聽德以為聰致遠以為明
又詩陳文王之德曰惟此文王帝度其心
貊其德音其德克明克明克類克長克君
王此大邦克順克比比于文王其德靡悔
既受帝祉施于孫子心能制義曰度德政
應和曰貊照監四方曰明施勤無私曰類

教誨不倦曰長賞慶刑威曰君慈和徧服
曰順擇善而從曰比經緯天地曰文如此
則為九德之美何技藝之尚哉今使人君
視如離婁聰如師曠御如王良射如夷羿
書如史籀計如隸首走追駟馬力折門鍵
有此六者可謂善於有司之職矣何益於
治乎無此六者可謂乏於有司之職矣何
增於亂乎必以廢仁義妨道德何則小器

弗能兼容治亂既不繫於此而中才之人
好也昔路豐舒晉知其亡也皆怙其三才
恃其五賢而以不仁之故也故人君多技
藝好小智而不通於大倫者適足以距諫
者之說而鉗忠直之口也祇足以追亡國
之迹而背安家之軌也不其然耶不其然
耶

審大臣第十六

帝者昧旦而視朝廷南面而聽天下將與
誰爲之豈非群公卿士歟故大臣不可以
不得其人也大臣者君之股肱耳目也所
以視聽也所以行事也先王知其如是也
故博求聰明睿哲君子措諸上位執邦之
政令焉執政則其事舉其事舉則一日僚任
其職百僚任其職則庶事莫不致其治庶
事致其治則九牧之民莫不得其所故書

曰元首明哉股肱良哉庶事康哉汝大臣者治萬邦之重器也不可以衆譽著也人主所宜親察也衆譽者可以聞斯人而已故堯之聞舜也以衆譽及其任之者則以心之所自見又有不因衆譽而獲大賢其文王乎畋於渭水邊道遇姜太公皤然皓首方秉竿而釣文王召而與之言則帝王之佐也乃載之歸以爲太師姜太公當此時貧且賤矣年又老矣非有貴顯之舉也其言誠當乎賢君之心其術誠合乎致平之道文王之識也灼然若披雲而見日霍然若開霧而觀天斯豈假之於衆人哉非惟聖然也霸者亦有之昔齊桓公夙出窰戚方爲旅人宿乎大車之下擊牛角而歌歌聲悲激其辭有疾於世桓公知其非常人也召而與之言乃立功之士也於是舉

而用之使知國政凡明君之用人也未有不悟乎己心而徒因衆譽也用人而因衆譽焉斯不欲爲治也將以爲名也然則見之不自知而以衆譽爲驗也此所謂效衆譽也非所謂效得賢能也苟以衆譽爲賢能則伯鯨無羽山之難而唐虞無九載之實矣聖人知衆譽之或是或非故其用人也則亦或因或獨不以一驗爲也況乎舉

非四嶽也世非有唐虞也大道寢矣邪說行矣臣已詐矣民已惑矣非有獨見之明專任衆人之譽不以己察不以事考亦何由獲大賢哉且大賢在陋巷也固非流俗之所識也何則大賢爲行也哀然不自儻然若無能不與時爭是非不與俗辯曲直不矜名不辭謗不求譽其味至淡其觀至拙夫如是則何以異乎人哉其異乎人

者謂心統乎群理而不繆智周乎萬物而
不過變故暴至而不惑真偽叢萃而不迷
故其得志則邦家治以和社稷安以固兆
民受其慶群生賴其澤八極之內同為一
斯誠非流俗之所豫知也不然安得赫赫
之譽哉其赫赫之譽者皆形乎流俗之觀
而曲同乎流俗之聽也君子固不然矣昔
管夷吾嘗三戰而皆北人皆謂之無勇與

之分財取多人皆謂之不廉不死子糾之
難人皆謂之背義若時無鮑叔之舉霸君
之聽休功不立於世盛名不垂於後則長
為賤丈夫矣魯人見仲尼之好讓而不爭
也亦謂之無能為之謠曰素鞞羔裘求之
無尤黑裘素鞞求之無戾夫以聖人之德
昭明顯融高宏博厚宜其易知也且猶若
此而况賢者乎以斯論之則時俗之所不

譽者未必為非也其所譽者未必為是也
故詩曰山有扶蘇隰有荷華不見子都乃
見狂且言所謂好者非好醜者非醜亦由
亂之所致也治世則不然矣叔世之君生
乎亂末大臣置宰相而信流俗之說故不
免乎國風之譏也而欲與之興天和致時
雍遏禍亂弭妖灾無異策穿蹄之乘而登
太行之險亦必顛躓矣故書曰肱股墮哉
萬事隳哉此之謂也然則君子不為時俗
之所稱曰孝悌忠信之稱也則有之矣治
國致平之稱則未之有也其稱也無以加
乎習訓詁之儒也夫治國致平之術不兩
得其人則不能相通也其人又寡矣寡不
稱衆將誰使辨之故君子不遇其時則不
如流俗之士聲名章徹也非徒如此又為
流俗之士所裁制焉高下之分貴賤之賈

一由彼口是以沒齒窮年不免於匹夫昔
荀卿生乎戰國之際而有叡哲之才祖述
堯舜憲章文武宗師仲尼明撥亂之道然
而列國之君以為迂濶不達時變終莫之
肯用也至於游說之士謂其邪術一作講其邪僻
率其徒黨而名震乎諸侯所如之國靡不
盡禮郊迎擁篲先驅受爵賞為上客者不
可勝數也故名實之不相當也其所從來

尚一作久矣何世無之天下有道然後斯物
廢矣

慎所從第十七

夫人之所常稱曰明君舍已而從人故其
國治以安闇君違人而專已故其國亂以
危乃一隅之偏說也非大道之至論也凡
安危之勢治亂之分在乎知所從不在乎
必從人也人君莫不有從人然或危而不

安者失所從也莫不有違人然或治而不
亂者得所違也若夫明君之所親任也皆
貞良聰智其言也皆德義忠信故從之則
安不從則危闇君之所親任也皆佞邪愚
惑其言也皆姦回諂諛從之安得治不從
之安得亂乎昔齊桓公從管仲而安二世
從趙高而危帝舜違四凶而治殷紂違三
仁而亂故不知所從而好從人不知所違
而好違人其敗一也孔子曰知不可由斯
知所由矣夫言或似是而非實或似美而
敗事或似順而違道此三者非至明之君
不能察也燕昭王使樂毅伐齊取七十餘
城莒與即墨未拔昭王卒惠王爲太子時
與毅不平即墨守者田單縱反間於燕使
宣言曰王已死城之不拔者三耳樂毅與
新王有隙懼誅而不敢歸外以伐齊爲名

實欲因齊人未附故且緩即墨以待其事
齊人所懼惟恐他將之來即墨殘矣惠王
以為然使騎劫伐之大為田單所破此則
似是而非實者也燕相子之有寵於王欲
專國政人為之言於燕王噲曰人謂堯賢
者以其讓天下於許由也許由不受有讓
天下之名而實不失天下今王以國讓於
相子之子之必不敢受是堯與王同行也

燕噲從之其國大亂此則似美而敗事者
也齊景公欲廢太子陽生而立庶子荼謂
大夫陳乞曰吾欲立荼如何乞曰所樂乎
為君者欲立則立之不欲立則不立君欲
立之則臣請立之於是立荼此則似順而
違道者也且夫言畫施於當時事效在於
後日後日遲至而當時速決也故今巧者
常勝拙者常負其勢然也此謂中主之聽

也至於闇君則不察辭之巧拙也二策並
陳而從其■已之欲者明君不察辭之巧
拙也二策並陳而從其致已之福者故高
祖光武能收群策之所長棄群策之所短
以得四海之內而立皇帝之號也吳王夫
差楚懷王襄棄伍員屈平之良謀收宰嚭
上官之諛言以失江漢之地而喪宗廟之
主此二帝三王者亦有從人亦有違人然

而成敗殊馳興廢異門者見策與不見策
耳不知從人甚易而見策甚難夷考其驗
斯為甚矣問曰夫人莫不好生而惡死好
樂而惡憂然觀其舉措也或去生而就死
或去樂而就憂將好惡與人異乎曰非好
惡與人異也乃所以求生與求樂者失其
道也譬如迷者欲南而反北也今略舉一
驗以言之昔項羽既敗為漢兵所追乃謂

其餘騎曰吾起兵至今八年身經七十餘戰所擊者服遂霸天下今而困於此此天亡我非戰之罪也斯皆存亡所由欲南反北者也夫攻戰王者之末事也非所以取天下也王者之取天下也有大本有仁智之謂也仁則萬國懷之智則英雄歸之御萬國揔英雄以臨四海其誰與爭若夫攻城必拔野戰必克將帥之事也羽以小人

之器闇於帝王之教謂取天下一由攻戰矜勇有力詐虐無親貪嗇專利功勤不賞有一范增既不能用又從而疑之至今憤氣傷心疽發而死豪傑背叛謀士違離以至困窮身為之虜然猶不知所以失之反瞋目潰圍斬將取旗以明非戰之罪何其謬之甚歟高祖數其十罪蓋其大略耳若夫纖介之失世所不聞其可數哉且亂君

之未亡也人不敢諫及其亡也人莫能窮
是以至死而不寤亦何足怪哉

亡國第十八

凡亡國之君其朝未嘗無致治之臣也其
府未嘗無先王之書也然而不免乎亡者
何也其賢不用其法不行也苟書法而不
行其事爵賢而不用其道則法無異乎路
說而賢無異乎木主也昔桀奔南巢紂踣

於京厲流於羸幽滅於戲當是時也三后
之典尚在良謀之臣猶存也下及春秋之
世楚有伍舉左史倚相右尹子革白公子
張而靈王喪師衛有大叔儀公子鱣遽出
玉史鮒而獻公出奔晉有趙宣子范武子
太史董狐而靈公被殺魯有子家羈叔孫
婁而昭公野死齊有晏平仲南史氏而燕
公不免虞虢有宮之奇舟之喬而二公絕

祀由是觀之苟不用賢雖有無益也然此
數國者皆先君舊臣世祿之士非遠求也
乃有遠求而不用之者昔齊桓公立稷下
之官設大夫之號招致賢人而尊寵之自
孟軻之徒皆遊於齊楚春申君亦好賓客
敬待豪傑四方並集食客盈館且聘荀卿
置諸蘭陵然齊不益強黃歇遇難不用故
也夫遠求賢而不用之何哉賢者之為物

也非若美嬪麗妾之可觀於目也非若端
冕帶裳之可加於身也非若嘉肴庶羞之
可實於口也將以言策策不用雖多亦奚
以為若欲備百僚之名而不問道德之實
則莫若鑄金為人而列於朝也且無食祿
之費矣然彼亦知有馬必待乘之而後致
遠有醫必待行之而後愈疾至於有賢則
不知必待用之而後興治者何哉賢者難

知歟何以遠求之易知歟何以不能用也
豈為寡不足用欲先益之歟此又惑之甚
也賢者稱於人也非以力也力者必須多
而知者不待衆也故王●七萬而輔佐六
卿也故舜有臣五人而天下治周有亂臣
十人而四海服此非用寡之驗歟且六國
之君雖不用賢及其致人也猶脩禮盡意
不敢侮慢也至於王莽既不能用及其致

也尚不能言莽之爲人也內實姦邪外慕
古義亦聘求名儒徵命術士政煩教虐無
以致之於是脅之以峻刑威之以重戮賢
者恐懼莫敢不至徒張設虛名以夸海內
莽亦卒以滅亡且莽之爵人其實囚之也
囚人者非必著之桎梏而置之囹圄之謂
也拘係之愁憂之之謂也使在朝之人欲
進則不得陳其謀欲退則不得安其身是

則以綸組爲繩索以印佩爲鉗鐵也

以印作

鐵也

爲鉗小人雖樂之君子則以爲辱故明

王之得賢也得其心也非謂得其軀也苟
得其軀而不論其心也斯與籠鳥檻獸無
以異也則賢者之於我也亦猶然雙言也豈
爲我用哉雖曰班萬鍾之祿將何益歟故
苟得其心萬里猶近苟失其心同衾爲遠
今不脩所以得賢者之心而務循所以執

賢者之身至於社稷顛覆宗廟廢絕豈不
哀哉荀子曰人主之患不在乎言不用賢
而在乎誠不用賢言賢者口也知賢者行
也口行相反而欲賢者進不肖者退不亦
難乎夫照蟬者務明其火振其樹而已火
不明雖振其樹無益也人主有能明其德
者則天下其歸之若蟬之歸火也善哉言
乎昔伊尹在田畝之中以樂堯舜之道聞

成湯作興而自夏如商太公避紂之惡居
於東海之濱聞文王作興亦自商如周其
次則審戚如齊百里奚入秦范蠡如越樂
毅遊燕故人君苟脩其道義昭其德音慎
其威儀審其教令刑無頗僻獄無放殘仁
愛普殷惠澤流播百官樂職萬民得所則
賢者仰之如天地愛之如親戚樂之如墳
簞歆之如蘭芳故其歸我也猶決壅導滯

水注之大壑何不至之有苟虛穢暴虐聲
香不登讒邪在側佞媚充朝殺戮不辜刑
罰濫害宮室崇侈妻妾無度撞鐘舞女淫
樂日縱賦稅繁多財力匱竭百姓凍餓死
孱盈野矜已自得諫者被誅內外震駭遠
近怨悲則賢者之視我容貌也如懸魍魎
殿也如狴犴采服也如衰絰絃歌也如號
哭酒醴也如滫滌肴饌也如糞土從事舉

錯每無一善彼之惡我也如是其有至哉
今不務明其義而徒設其祿可以獲小人
難以得君子君子者行不媮合立不易方
不以天下枉道不以樂生害仁安可以祿
誘哉雖強搏執之而不獲已亦杜口佯愚
苟免不暇國之安危將何賴焉故詩曰威
儀卒遷善人載尸此之謂也

賞罰第十九

政之大綱有二二者何也賞罰之謂也人
君明乎賞罰之道則治不難矣夫賞罰者
不在乎必重而在於必行必行則雖不重
而民
不行則雖重而民怠故先王務賞
罰之必行書曰爾無不信朕不食言爾不
從誓言予則孥戮汝罔有攸赦天生烝民
其性一也刻肌虧體所同惡也被文垂藻
所同好也此二者常存而民不治其身有

由然也當賞者不賞當罰者不罰夫當賞者不賞則為善者失其本望而疑其所行當罰者不罰則為惡者輕其國法而怙其所守苟如是也雖日用斧鉞於市而民不去惡矣日錫爵祿於朝而民不興善矣是以聖人不敢以親戚之恩而廢刑罰不敢以怨讐之忿而廢慶賞夫何故哉將以有救也故司馬法曰賞罰不踰時欲使民速

見善惡之報也踰時且猶不可而况廢之

者乎賞罰不可以踰亦不可以數數則所及者多踰則所漏者多賞罰不可以重亦不可以輕賞輕則民不勸罰輕則民亡懼

賞重則民徼幸罰重則民無聊

一作不故

先王明廢以德之思中以平之而不失其節故書曰罔非在中察辭於差夫賞罰之於萬民猶轡策之於駟馬也轡策不調非

徒遲速之分也至於覆車而摧轅賞罰之不明也則非徒治亂之分也至於滅國而喪身可不慎乎可不慎乎故詩云執轡如組兩驂如舞言善御之可以為國也

民數第二十

治平在庶功興庶功興在事役均事役均在民數周民數周為國之本也故先王周知其萬民衆寡之數乃分九職焉九職既

分則劬勞者可見怠惰者可聞也然而事役不均者未之有也事役既均故民盡其心而人竭其力然而庶功不興者未之有也庶功既興故國家殷富大小不匱百姓休和下無怨疾焉然而治不平者未之有也故曰水一作泉有源治有本道者審乎本而已矣周禮孟冬司寇獻民數於王王拜而受之登於天府內史司會冢宰貳之其

重之如是也今之為政者未知恤已矣譬
由無田而欲樹藝也雖有良農安所措其
疆力乎是以先王制六卿六遂之法所以
維持其民而為之綱目也使其鄰比相保
相愛刑罰慶賞相延相及故出入存亡臧
否順逆可得而知矣如是姦無所鼠罪人
斯得造及亂君之為政也戶口漏於國版
夫家脫於聯伍避役者有之一作通逃弃

捐者有之浮食者有之於是姦心競生僞
端並作矣小則盜竊大則攻劫嚴刑峻法
不能救也故民數者庶事之所自出也莫
不取正焉以分田里以令貢賦以造器用
以制祿食以起田役以作軍旅國以之建
典家以之立度五禮用脩九刑用措者其
惟審民數乎

吳人韓壽椿繕寫

徐幹中論卷之下

書新刊中論後

文章自六經而下惟先秦西漢為近古其次則及於東漢予鄉得桓氏鹽鐵論讀之未嘗不嘆其辭氣之古論議之妙至不忍去手繼讀徐氏中論其辭氣論議視桓氏無大相遠而予之愛之與鹽鐵同蓋鹽鐵西漢之文中論東漢之文也二書雖幸存於世然傳錄之艱人不易見往歲同年涂

君刻鹽鐵論於江陰俾予識之近黃華卿
氏刻中論畢工亦俾一言予謂好古之士
世未嘗無第所恨者不得悉窺古人之製
作而效法之而坊肆所市率多射利之時
文求如一書蓋不可得而今乃有之豈非
學者之幸乎予也舊學荒落獲見古書之
行爲之欣躍而且得綴名其末其爲幸又
何如也華卿名紋今爲吳縣學生觀是舉

可以知其人矣

弘治壬戌六月之望前進士姑蘇都穆書

Vertical columns of text in a traditional Chinese format, likely bleed-through from the reverse side of the page. The text is arranged in approximately 12 columns, with the rightmost column being the narrowest and the leftmost being the widest. The characters are small and difficult to read due to the bleed-through effect.

Small square seal impression in seal script, located at the bottom left of the text area.

Small square seal impression in seal script, located at the bottom left of the text area, below the first seal.



